



## SORAS DOMINICANAS DA GLION

### 70 onns missiunarias en Brasilia

Avon 70 onns ein zacontas soras **dominicanas** da Glion serendidas en Brasilia sco missiunarias. Lur motivaziun secloma aunc adina: «Dar **vinavon** speranza ella resignaziun ed agid en vesta alla pupira carschenta e violenza». La menadra dalla Procura dallas missiuns dallas soras da Glion, *Christine Imholz*, ha visitau duront il meins da mars d'uonn tuts projects da lur missiun en Brasilia. Ella ei stada fetg impressiunada dalla realitad da leuen, dil vast engaschi dils responsabels e dalla cordiala hospitalitad. Ella gest edida Brev circulara «berichtet und beleuchtet» dat la menadra dalla Procura investa ella situaziun actuala. Ella muossa denton era, co tut ha entschiet avon 70 onns. Duront siu viadi tras la missiun en Brasilia ein ils responsabels semussai engrazieivels visavi numerus carstgauns che han tras lur solidaritad adina puspei dau sustegn e speranza allas missiunarias.

#### Sentupada cun las missiunarias a Glion

Ils 22 d'october d'uonn dat ei en claustra a Glion ina sentupada cun soras ord la missiun en Brasilia. Ellas prendan part dil Capetel general da lur cuminonza e stattan per in temps a Glion. Las soras en Brasilia dian ch'ellas seigien bein promptas e preparadas da segidar, mo hagian buc ils mieds finanziaus necessaris per realisar novaziuns e projects. Ils fauturs e las donaturas seigien perquei daventai impurtonts partenaris per che las missiunarias sappien agir en Brasilia per giustia, pasch e dignitad humana. Las soras da Glion vulan era s'engaschar tras ovras e cun gronda speranza egl avegnir en Brasilia en favur d'affons, giuvenils e dunnas els quaters agl ur dils marcaus. (cdm/gc)